

JAMHURI YA MUUNGANO WA TANZANIA
KATIKA MAHAKAMA KUU DIVISHENI YA KAZI
DAR ES SALAAM
MAOMBI ANUAI YA KIKAZI NA. 314 YA 2022

ABDALLAH A. ALMAS	MLETA MAOMBI WA 1
ODILO KYAHE	MLETA MAOMBI WA 2
SAID MAGOMA... ..	MLETA MAOMBI WA 3
ZUHURA YUSUFU	MLETA MAOMBI WA 4
HALIMA AYUNI.	MLETA MAOMBI WA 5
SALIM YAHYA.	MLETA MAOMBI WA 6
LUCY MWAMI.	MLETA MAOMBI WA 7
MOHAMED HAJI.	MLETA MAOMBI WA 8
ILAILA NAMPOKELA	MLETA MAOMBI WA 9
MOHAMED KANIKI.	MLETA MAOMBI WA 10
JANETH ANTHONI	MLETA MAOMBI WA 11
SECILIA MOGELA	MLETA MAOMBI WA 12
PRIMITIVA KAHIGI	MLETA MAOMBI WA 13
MWANAIIDI OMARY	MLETA MAOMBI WA 14
HADIJA SALIM.	MLETA MAOMBI WA 15
ASUMINI HUSSEIN.	MLETA MAOMBI WA 16
ZUWENA JUMA.....	MLETA MAOMBI WA 17
COSMAS LUPANDE.	MLETA MAOMBI WA 18
ALLY HAMISI.	MLETA MAOMBI WA 19
RAMADHAN FORGO... ..	MLETA MAOMBI WA 20
HEMED SAID.	MLETA MAOMBI WA 21
SAMSON NYABANGE	MLETA MAOMBI WA 22
IDDY AMIN	MLETA MAOMBI WA 23
JASTINE KAONEKA	MLETA MAOMBI WA 24
NASRA ABDUL.....	MLETA MAOMBI WA 25
SHARIFA YASINI	MLETA MAOMBI WA 26

DHIDI YA

A-ONE PRODUCTS AND BOTTLES LTD.....MJIBU MAOMBI WA 1

PETER FIDELIS MNYANYI.....MJIBU MAOMBI WA 2

UAMUZI MDOGO

K.T. R Mteule, J

06 Machi, 2023 & 14, Machi 2023

Huu ni uamuzi wa pingamizi la awali kuhusu uwezo wa maombi haya kusimama kisheria kutokana na hoja ya mleta maombi wa kwanza kwamba maombi kama haya yalishasikilizwa na kufanyiwa uamuzi na Mahakama hii.

Waleta maombi ni washinda tuzo katika Mgogoro wa Kazi Na. CMA/DSM/ILA/287/12/93. Walifungua maombi ya utekelezaji wa tuzo inayotokana na mgogoro huu wa kikazi.

Baada ya ushindi wa waleta maombi katika ngazi mbalimbali za Mahakama kuanzia Tume ya Usuluhishi na Uamuzi, Mahakama Kuu na Mahakama ya Rufani, waleta maombi walifungua shauri la utekelezaji deni **tuzo No. 609 la mwaka 2018** katika mahakama hii. Kupitia aliyekuwa mwakilishi wa waleta maombi Bwana Peter Mnyanyi ambaye ni mjibu maombi wa pili, makubaliano yalifanyika kumaliza mgogoro na

kutokana na mapatano hayo, Mahakama ilimaliza shauri la ukazaji deni **tuzo No.609 la mwaka 2019.**

Waleta maombi hawakukubaliana na mapatano hayo wakidai kuwa hawakuruhusu mapatano yoyote kufanyika kwa niaba yao. Kwa mujibu wa kiapo cha waleta maombi, walibaini kwamba Mleta maombi wa pili kumbe alikuwa ameshalipwa fedha za mapatano toka tarehe 20.12.2021 na aliamua kukaa kimya bila kuwajulisha lolote kinachoendelea kama kuna mapatano ya kumaliza shauri.

Katika kupata tafsiri ya hatma ya haki zao, waleta maombi walifungua **maombi Na. 56 ya 2021** katika Mahakama hii wakiomba Mahakama kutengua hati ya makubaliano iliyoingiwa na Mjibu maombi wa pili kwa niaba ya waleta maombi. Mamo tarehe 03.08.2022 maombi hayo yalitupiliwa mbali kwa sababu hayakuzingatia muda.

Wakiwa bado na nia ya kupata ufumbuzi wa makubaliano ambayo wanaamini hayakuwa na baraka zao, waleta maombi wanataka kuleta tena maombi ya marejeo dhidi ya makubaliano hayo. Kwa vile muda umepita, wameleta maombi haya ili kuomba kuongezewa muda ili kuleta maombi hayo ya marejeo dhidi ya hati ya makubaliano.

Wajibu maombi wameleta viapo kinzani na wote wakaja na mapingamizi ya awali. Pingamizi la awali la mjibu maombi wa pili lilitupwa kutokana na yeye kutokuwepo.

Katika pingamizi la Mjibu maombi wa kwanza, anapinga maombi haya kusimama kisharia kwa hoja kwamba maombi kama haya yalishafunguliwa kupitia **Maombi No. 56 ya 2021** na kutupiliwa mbali na hivyo mahakama imefungwa mkono. Kutokana na hoja hii, Mleta maombi wa kwanza anaiomba mahamama ione kuwa imefungwa mikono kwa kuwa shauri kama hili limeshaamuliwa.

Hoja iliyopo mbele yangu ni kama maombi kama haya yalishatupiliwa mbali na hivyo Mahakama kufungwa mikono kuendelea na maombi yaliyopo sasa.

Pingamizi lilisikilizwa kwa njia ya mdomo. Mleta maombi wa kwanza aliwakilishwa na Bi Ndehorio Ndessamburo ambaye aliwasilisha kwamba amri ya kutupilia mbali shauri (dismissal order) inamaliza shauri hilo na kulifanya kufikia hatma. Alirejea kesi ya **Yahaya Hamisi versus Hamida Haji Iddi and 2 Others, Civil Appeal No 225 of 2018, CAT**. Kwa mujibu wa Ndehorio, Mahakama ya Rufani katika kesi hii imetoa tofauti kati ya kesi kutupiliwa mbali (dismissal) na kesi kufutwa (strike out) ambapo tafsiri ya kesi kutupiliwa mbali madhara yake ni kesi

kufikia hitimisho. Alireje pia kesi ya **East Africa Development Bank versus Blue Line Enterprises Limited, Civil Appeal No. 161 pf 2009**. Alisema kwa tafsiri ya Mahakama ya Rufani, Mahakama inafungwa mikono kusikiliza shauri ambalo imewahi kulitupilia mbali. Akirejea kesi hiyo hiyo ya **Blue Line**, Ndehorio alieleza kuwa waleta maombi hawawezi kuomba kuongezewa muda kuleta shauri ambalo tayari limeshatupiliwa mbali.

Upande wa waleta maombi umewakilishwa na mwakilishi binafsi Bw. Michael Mgombozi ambaye amesema kwamba kuna tofauti kati ya maombi haya na **maombi Na. 56 ya 2021** ambayo yalitupiliwa mbali. Kwa maoni yake, **maombi Na 56 ya 2021** yaliomba marejeo ya hati ya makubaliano wakati maombi haya yanaomba marejeo ya uamuzi wa msajili.


Nimeangalia kilichoombwa katika maombi haya; ipo wazi kwamba waombaji wanaomba kuongezewa muda ili kuleta maombi ya marejeo dhidi ya hati ya makubaliano. Nimeangalia pia katika maombi Na. 56 ya 2021 na kuthibitisha kwamba maombi yale yaliomba Mahakama ifanya marejeo dhidi ya hati ya makubaliano kati ya mjibu maombi wa kwanza na mjibu maombi wa pili. Kesi ya **Blue Line** ambayo wakili wa mjibu maombi ameirejea imeweka wazi kwamba Mahakama haiwezi kusikiliza

maombi ya kurejesha shauri ambalo limetupiliwa mbali kutokana na kupitwa na muda.

Kutokana na kesi hiyo, natofautiana na Bw. Mgombozi kwamba kuna tofauti inayoondoa kifungo katika mikono ya Jaji kuruhusu usikilizwaji wa maombi yanayoombewa ongezeko la muda wa kuleta shauri ambalo limeshatupiliwa mbali. Bado mahakama itaendelea kufungwa mikono kwani maombi haya yakiruhusiwa, kitakacholetwa ni kile kilichokwisha kutupiliwa mbali. Kwa kuongozwa na uamuzi wa Mahakama ya Rufani wa kasi ya **Blue Line**, nakubaliana na wakili wa mjibu maombi wa kwanza kwamba Maombi haya yapo kinyume na sheria kwa kuomba jambo ambalo limeshatupiliwa mbali.

Kutokana na sababu hizi, pingamizi la Awali linakubaliwa na Maombi haya yanatupiliwa mbali.

Mjibu maombi wa kwanza ameomba gharama. Nakubaliana na Bw. Mgombozi kwamba kwa kuwa ni shauri la kazi, hakuna gharama. Kila upande utashughulika na gharama zake.



KATARINA REVOCATI MTEULE

JAJI

14/3/2023

